

T 2511

3243

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
SEP 1 1938

昆蟲草木略第一

通志七十五

序 草類

學者皆操窮理盡性之說而以虛無為宗至於實學則置而不問當仲尼之時已有此患故曰小子何莫學夫詩詩可以興可以觀可以羣可以怨邇之事父遠之事君多識於鳥獸草木之名其曰小子者無所識之辭也其曰何莫者苦口之辭也故又曰人而不為周南召南其猶正牆面而立此苦口之甚也一部論語言他書不過一再惟詩則言之又言凡十二度言焉門弟子有能



學詩者則深喜之子貢子夏在孔門未爲高弟至於論詩則與之至子夏又發起予之嘆者深嘉之也夫樂之本在詩詩之本在聲竊觀仲尼初亦不達聲至哀公十一年自衛反魯質正於太師氏而後知之故曰吾自衛反魯然後樂正雅頌各得其所此言詩爲樂之本而雅頌爲聲之宗也其曰師摯之始關雎之亂洋洋乎盈耳哉此言其聲之盛也又曰關雎樂而不淫哀而不傷此言其聲之和也人之情聞歌則感樂者聞歌則感而爲淫哀者聞歌則感而爲傷惟關雎之聲和而平樂者聞

之而樂其樂不至於淫哀者聞之而哀其哀不至於傷此關雎所以爲美也緣漢人立學官講詩專以義理相傳是致衛宏序詩以樂爲樂得淑女之樂淫爲不淫其色之淫哀爲哀窈窕之哀傷爲無傷善之傷如此說關雎則洋洋盈耳之旨安在平臣之序詩於風雅頌曰風土之音曰風朝廷之音曰雅宗廟之音曰頌而不曰風風者教也雅者正也言王政之所由廢興也頌者美盛德之形容也於二南則曰周爲河洛召爲岐雍河洛之南瀕江岐雍之南瀕漢江漢之間二南之地詩之所起

在於此屈宋以來騷人墨客多生江漢故仲尼以二南之地爲作詩之始而不曰南言化自北而南於王黍離幽七月則曰王爲王城東周之地幽爲幽豐西周之地七月者西周之風黍離者東周之風而不曰黍離降國風臣之序詩專爲聲歌欲以明仲尼之正樂臣之釋詩深究鳥獸草木之名欲以明仲尼教小子之意然兩漢之言詩者惟儒生論義不論聲而聲歌之妙猶傳於瞽史經董卓赤眉之亂禮樂淪亡殆盡魏人得漢雅樂郎僅能歌文王鹿鳴騶虞伐檀四篇而已太和之末又亡

其三惟有鹿鳴至晉又亡自鹿鳴亡後聲詩之道絕矣夫詩之本在聲而聲之本在與鳥獸草木乃發興之本漢儒之言詩者既不論聲又不知興故鳥獸草木之學廢矣若曰關關雎鳩在河之洲不識雎鳩則安知河洲之趣與關關之聲乎凡鴈鷺之類其喙褊者則其聲關關雞雉之類其喙銳者則其聲鷺鷥此天籟也雎鳩之喙似鳧鴈故其聲如是又得水邊之趣也小雅曰呦呦鹿鳴食野之苹不識鹿則安知食苹之趣與呦呦之聲乎凡牛羊之屬有角無齒者則其聲呦呦駝馬之屬有

齒無角者則其聲蕭蕭此亦天籟也鹿之喙似牛羊故其聲如是又得萋蒿之趣也使不識鳥獸之情狀則安知詩人關關呦呦之興乎若曰有敦瓜苦蒸在栗薪者謂瓜苦引蔓於籬落間而有敦然之繫焉若曰桑之未落其葉沃若者謂桑葉最茂雖未落之時而有沃若之澤使不識草木之精神則安知詩人敦然沃若之興乎陸璣者江左之騷人也深爲此患爲毛詩作鳥獸草木蟲魚疏然璣本無此學但加採訪其所傳者多是支離自陸璣之後未有以此明詩者惟爾雅一種爲名物之

宗然孫炎郭璞所得旣希張揖孫憲所記徒廣大抵儒生家多不識田野之物農圃人又不識詩書之旨二者無由參合遂使鳥獸草木之學不傳惟本草一家人命所系凡學之者務在識真不比他書只求說也神農本經有三百六十以應周天之數陶弘景隱者也得此一家之學故益以三百六十以應周天之數而兩之臣少好讀書無涉世意又好泉石有慕弘景心結茅夾溱山中與田夫野老往來與夜鶴曉猿雜處不問飛潛動植皆欲究其情性於是取陶隱居之書復益以三百六十

以應周天之數而三之已得鳥獸草木之真然後傳詩
已得詩人之興然後釋爾雅今作昆蟲草木略爲之會
同庶幾衰晚少備遺忘豈敢論實學也夫物之難明者
爲其名之難明也名之難明者謂五方之名旣已不同
而古今之言亦自差別是以此書尤詳其名焉

草類

芝曰菌其類有五色加以紫是爲六芝青曰龍芝赤曰
丹芝黃曰金芝白曰玉芝黑曰玄芝紫曰木芝瑞草也
生則有雲氣及禽獸之異

著如蒿華如菊生上蔡白龜祠傍一叢之幹二三十
四五十高五六赤褚先生云著蒲滿百莖者其下有神龜
守之其上有青雲以覆之傳曰天下和平王道得著莖
長丈叢滿百

蘭即蕙蕙即薰薰即零陵香楚辭云滋蘭九畹植蕙百
畝互言也古方謂之薰草故名醫別錄出薰草條近方
謂之零陵香故開寶本草出零陵香條神農本草經謂之
蘭臣昔修本草以二條貫於蘭後明一物也臣謹案蘭
舊名煎澤草婦人和油澤頭故以名焉南越志云零陵

香一名燕草又名薰草即香草生零陵山谷今湖嶺諸州皆有又別錄云薰草一名蕙草明薰蕙之爲蘭也以其質香故可以爲膏澤可以塗宮室近世一種草如茅葉而嫩其根謂之土續斷其花馥郁故得蘭名誤爲人所賦詠

芎藭曰胡藭曰香果關中者曰京藭蜀道者曰川芎其葉曰蘼蕪亦曰蘄藭故爾雅蘄藭蘼蕪亦曰茝藭以其芬香故多蒔於園庭苗似芹胡荽蛇牀輩故淮南子云亂人者若芎藭之與藁本蛇牀之與蘼蕪也

蛇牀曰蛇粟曰蛇米曰虺牀曰思益曰繩毒曰棗棘曰牆藜曰盱曰馬牀爾雅所謂盱虺牀也花白子如黍粒葉似芎藭而細亦香故有牆藜之名焉

茜亦作蒨可以染緋故曰地血亦曰茹蘆曰茅蒐齊人謂之茜徐人謂之牛蔓詩所謂茹蘆在阪爾雅所謂茹蘆茅蒐莖葉麗澁而根紅故許慎謂人血所生周禮庶氏掌除蠱毒以嘉草攻之陳藏器以蘘荷與茜爲嘉草杜若曰杜蘅曰杜連曰白蓮曰白苓曰若芝曰楚蘅根葉似山薑花似荳蔻騷人多取喻焉故楚詞云山中人

兮芳杜若九歌云採芳洲兮杜若又離騷云雜杜蘅與
芳芷唐貞觀中勅下度支求杜若省郎以謝元暉詩云
芳洲採杜若乃責坊州貢之當時以爲嗤笑

決明曰芙蓉曰蔘關西曰蔘若故爾雅云蔘若芙蓉共
有三種其一則山決明也相似而不可食其二曰馬蹄
決明實似馬蹄尤良

天名精曰麥句薑曰蝦蟇藍曰豕首曰天門精曰虺顛
曰蟾蜍蘭曰覲曰芴藟曰豨首曰天蔓精曰鹿活草曰
劉愷草爾雅云芴藟豕首俗曰豨蒼又云火於又云地

菘異苑云宋元嘉中青州劉愷射中一麋旣剖五藏以
此草塞之蹶然而起去之則仆如此者三是以知其治
折傷故其草得劉愷之名

菟絲曰菟蘆曰菟縷曰唐蒙曰玉女曰赤網曰菟纍曰
女蘿爾雅曰唐蒙女蘿女蘿菟絲又曰蒙玉女詩曰蔦
與女蘿施于松上草經曰蔓延草木之上色黃而細曰
赤網色淺而大曰菟纍淮南子注云菟絲生茯苓上故
世言下有茯苓上有菟絲又言菟絲初生之根其形似
兔掘取割其血和丹服之立變化今皆不然茯苓生山

谷菟絲生人間清濁異趣何由同居

薊曰虎薊曰刺薊曰山牛蒡爾雅藟繫狗毒藟即薊也又有一種小薊曰猫薊曰青刺薊北方曰千針草以其莖葉多刺故也華如紅藍華而青紫色多生於燕地故曰

薊門

垣衣曰昔邪曰烏韭曰垣羸曰天韭曰鼠韭有數種生於屋上曰屋游生於屋陰曰垣衣在石上謂之烏韭在地上謂之地衣在井中謂之井中苔在牆上曰壁苔然者謂之土馬駿生於水中謂之陟釐水中苔

中者可食又有生於石上連緣作暈者謂之石花石花生於海中石上謂之紫莢即紫菜也松上之衣曰艾納香以和香燒則煙氣直上

海藻類紫莢而麓惡曰落首曰薄曰石衣曰海蘿爾雅云薄石衣郭氏云石髮也又云薄海藻郭氏云如亂髮其說無別致誤後人引據且薄與薄藻與藻皆無異義何得爲二物海藻形如弊衣石髮形如亂髮自是二物凡此之類易得渾殺又有石帆之於水松亦能相亂故陶弘景云石帆如栢療石淋水松如松療溪毒吳都賦

所謂石帆水松是也又有海帶似帶昆布似布爾雅云
綸似綸組似組東海有之綸即鹿角菜組即海中苔
藻生乎水中萍生乎水上萍之名類亦多易相紊也爾
雅云苹萍其大者蘋又云苹蘩蕭足以惑人萍者水中
浮萍也江東謂之藻是也蘋水菜也葉似車前詩所謂
于以采蘋是也苹萋蒿也即蘩蕭詩所謂呦呦鹿鳴食
野之苹是也按萍亦曰水花亦曰水白

肉蓯蓉曰肉松容舊曰馬精化爲蓯蓉人血化爲茹蘆
故蓯蓉生於沙中在西方多馬處然亦有生於大木間
及土壟上者

地膚曰地葵曰地麥曰益明曰落帚子曰鴨舌即獨掃
也亦曰地掃爾雅云莽馬帚即此也今人亦用爲帚

蒺藜曰旁通曰屈人曰止行曰犴羽曰升推曰即藜曰
茨故爾雅謂茨蒺藜詩謂牆有茨也其實有芒刺行軍
之家以鐵象之而布地焉又有白蒺藜者同名而異實
防風曰銅芸曰茴草曰百枝曰屏風曰簡根曰百蜚葉
如青蒿嫩苗可茹

石龍葛曰龍須曰草續斷曰龍朱曰龍華曰懸莞曰草

毒曰方實爾雅所謂葍鼠莞也生被崖垂下故得龍須之名可以為席

絡石曰石鮫曰石蹠曰略石曰明石曰領石曰懸石如薜荔而小絡石以生

千歲藟曰藟蕪陸璣云一名巨瓜連蔓而生幽州人謂之推累此草藤生大者盤礴故有千歲藟之名唐姜撫言服常春藤使白髮還鬢明皇使取以賜中朝老臣又言終南山有旱藕食之延年狀類葛粉帝作湯餅以賜大臣右驍騎將軍甘守誠能名藥石曰常春藤者千歲

藟也旱藕者牡蒙也

黃連曰玉連曰支連

沙參葉如枸杞根如葵曰苦心曰志取曰虎須曰白參曰識美曰文希亦曰知母而得五參之名

丹參葉如薄荷花如蘇曰鄰蟬草曰赤參曰木羊乳曰

山苓本草曰奔馬俗謂之逐馬言驅風之駛也

赤箭曰離母曰鬼督郵曰合離曰獨搖曰定風有風不動無風自搖

藟藟曰滿冬曰地門冬曰筵門冬在東嶽名淫羊藿

抱朴

子作淫
羊食

在中嶽名天門冬在西嶽名管松在北嶽名無
不愈在南嶽名百部在京陸山阜名顛棘今日天門冬
爾雅牆藜藿冬葉如絲縷

禹諱曰禹餘糧曰烏韭曰爨火冬曰忍冬曰忍陵曰不
死藥曰僕壘曰隨脂秦名羊韭齊名變韭楚名馬韭越
名羊著今日麥門冬其葉如韭所以多得韭名

山薊曰木爾雅木山薊蒼木也枹薊曰楊爾雅楊枹薊
有兩種赤木白木也生平地曰薊生山中曰木亦曰山
連亦曰山精亦曰天蘇亦曰山芥亦曰乞力伽日華子作
吃力伽

萎蕤曰熒曰地節曰玉竹曰馬薰曰黃芝曰玉女萎

黃精曰重樓曰菟竹曰雞格曰救窮曰鹿竹曰龍銜曰

萎蕤曰狗格本草作
苟格曰垂珠曰馬箭曰白朮陶弘景謂

似鈎吻非也似藁荷

芩曰芑地黃也

藟曰屋茨曰起實交州曰藟珠薏苡也

芣苢曰當道曰蝦蟇衣曰牛遺曰勝鴛曰馬舄車前也

昌陽曰堯韭菖蒲也

棘菟曰蔓繞曰細草葉曰小草遠志也

瀟曰蕙曰蕙曰芒芋曰鵠瀉曰及瀉澤瀉也詩云言采其蕙爾雅云瀟蕙

薯蕷曰山藟曰修脆曰諸藟曰兒草秦楚名菜延鄭越名土藟齊名山芋

菊花曰日精曰節華曰女節曰女華曰女莖曰更生曰周盈曰傳延年曰陰成曰治籬其白花者潁川曰回峰汝南曰荼苦蒿河內曰地薇蒿上黨曰羊歡草

甘草曰落草曰蜜甘曰美草或曰大苦即此也九草獨惟甘草爲國老大黃爲將軍不言君臣佐使也

菟蔚曰益母曰益明曰大札曰貞蔚曰萑曰負樵曰枯曰鬱臭草曰苦低草曰萑葉似荏方莖白華詩所謂中谷有萑也

人參曰人街曰鬼蓋曰神草曰人微曰土精曰血參如人形者則神故多得人名朝鮮之人贊云三桎五葉背陽向陰欲來求我擬樹相尋

石斛曰林蘭曰禁生曰杜蘭曰石蓮生于陰崖莖如釵股其生于樛者木斛石斛之莖如金釵故謂之金釵牛膝之節如牛膝故謂之牛膝

卷栢曰萬歲曰豹足曰求股曰交時葉如栢狀如雞足
生於陰崖

細辛曰小辛曰細草而世以杜衡亂其真

獨活曰羗青曰護羗使者曰胡王使者曰獨搖草得風
不搖無風自動雖與羗活異條而亦曰羗活

升麻曰周麻曰落新婦

芫胡曰地薰曰山菜曰茹草藥曰芸蒿辛香可食生於銀
夏者芬馨之氣射於雲間多白鶴青鶴翱翔其上

防葵曰梨蓋曰旁慈曰爵離曰農果曰利茹曰方蓋而

狼毒能亂其真

菴藺狀如蒿艾駮驢食之仙

白蒿即茵陳蒿白兔食之仙

薪萇曰葳薪曰大蕺曰馬辛爾雅曰姚莖涂薺又曰薪
萇大薺以似薺而大也

龍膽曰陵游莖如小竹根似牛膝

王不留行曰禁宮花曰翦金花葉似槐實作房

茵陳蒿南人所使用者似香薷北人所使用者似青蒿即白
蒿也南北所用俱有山茵陳之名同名異實又有石香

菜亦名山茵陳而香薷亦名茵陳四種足相紊也

漏蘆曰野蘭而飛廉曰漏蘆亦能相紊

飛廉曰漏蘆曰天葵曰伏豬曰飛輕曰伏兔曰飛雉曰木禾似苦笑而葉下附莖有皮起似箭羽刻缺

牆薇曰營實曰牆牀本草作曰牛棘曰牛勒曰藿藜曰

山棘

薇銜曰承膏曰承肌曰無心曰無顛曰鹿銜曰吳風草葉似茺蔚叢生有毛

五味子曰蒨曰莖藜故爾雅云蒨莖藜引蔓實如珠而

赤

旋花曰鼓子花曰筋根花曰金沸曰美草曰朮腸草蔓生花不作瓣故謂之旋也此草一名金沸而旋覆花亦名金沸旋花正謂之葛旋旋覆正謂之旋復易相紊也然方家所用者葛旋用根旋復用花

白兔藿曰白葛蔓生葉圓如蓴

鬼督郵曰獨搖草莖如箭幹葉如繖蓋花生葉心根橫而不生須徐長卿赤箭俱有鬼督郵之名而實異

藍有三種蓼藍如蓼染綠大藍如芥染碧槐藍如槐染

青三藍皆可作澱色成勝母故曰青出於藍而青於藍
景天曰戒火曰火母曰救火曰據火曰慎火今人皆謂
之慎火草植弱而葉嫩種之階庭能辟火

續斷曰龍豆曰屬折曰接骨曰南草曰槐曰大薊曰馬
薊蜀本岡經云莖方葉似苧花似益母根如大薊此北
續斷也范汪云即馬薊也與小薊相似葉如芎藭菜兩
邊有刺花紫會稽者正爾此南續斷也

雲實曰負實曰雲英曰天豆曰馬豆曰臭草曰羊石子
葉如苜蓿花黃白莢如大豆實若大麻能殺精物燒之

致鬼

黃耆有白水耆赤水耆木耆三種其莖葉曰戴糝曰戴
堪曰芟草曰蜀脂曰百本曰王孫

徐長卿曰別仙蹤曰鬼督郵苗如小麥子似羅摩

薜曰山蘄曰白蘄曰乾歸曰文無爾雅謂薜山蘄又謂
薜白蘄即當歸也葉似芎藭有兩種大葉者謂之馬尾
當歸細葉者謂之蠶頭當歸此方家之別也

鋌曰何離曰解倉曰犁食曰餘容曰白木即芍藥也以
有何離之名所以贈別用焉古今言木芍藥是牡丹崔

豹古今注云芍藥有二種有草芍藥有木芍藥木者花大而色深俗呼爲牡丹非也安期生服鍊法云芍藥有二種有金芍藥有木芍藥金者色白多脂木者色紫多脉此則驗其根也然牡丹亦有木芍藥之名其花可愛如芍藥宿枝如木故得木芍藥之名芍藥著於三代之際風雅之所流詠也牡丹初無名故依芍藥以爲名亦如木芙蓉之依芙蓉以爲名也牡丹晚出唐始有聞貴游趨競遂使芍藥爲落譜衰宗

藁本曰鬼卿曰地新曰微莖

葛曰雞齊根曰鹿藿曰黃斤而藺亦謂之鹿藿

知母曰蚘母曰連母曰野蓼曰地參曰水參曰水浚曰貨母曰蛄母曰女雷曰女理曰兒草曰鹿列曰韭逢曰兒腫草曰東根曰水須曰荳蔻曰藟曰昌支爾雅曰藟荳蔻

貝母曰空草曰藥實曰苦花曰苦菜曰商草曰勤母曰商爾雅曰商貝母詩云言采其蟲

栝樓曰地樓曰果臝曰天瓜曰澤姑曰白藥其實曰黃瓜詩云果臝之實爾雅云果臝之實栝樓

玄參曰重臺曰玄臺曰鹿腸曰正馬曰咸曰端曰遂馬
曰馥草

苦參曰水槐曰苦識曰地槐曰菟槐曰驕槐曰白莖曰
虎麻曰岑莖曰祿白曰陵郎

石龍芮曰魯果能曰地樵曰石能曰彭根曰天豆沈括
云有兩種水中生者葉光而末圓陸生者葉毛而末銳
石韋曰石鞭曰石皮生於石崖其生瓦上者曰瓦韋皆
感陰濕而生每莖抽一葉背有毛而斑點其狀如皮故
得韋名

狗脊曰石枝曰強脊曰扶蓋曰扶筋葉類蕨根類菝葜
草解草解曰赤節菝葜曰金剛根謂其根堅曰王瓜草
謂其苗葉與王瓜相近

通草曰附支曰丁翁曰王翁萬年方書亦謂之木通爾
雅曰離南活菹以活菹亦謂之離南今人謂之通草其
瓢白可愛婦人取以為首飾其實曰燕覆子曰烏覆曰
桴梭子曰孳子

瞿麥曰巨句麥曰大菊曰大蘭曰苾蒻曰杜母草曰燕
麥曰籊麥曰雀麥曰石竹故爾雅云大菊蘧麥其葉細

嫩花如錢可愛唐人多像此為衣服之飾所謂石竹繡
羅衣

敗醬曰鹿腸曰鹿首曰馬草曰澤敗曰鹿醬葉似豨莶
根似柴胡作敗醬氣故以得名

澤芬曰白芷曰白芷曰白芷曰薑曰莞曰符離楚人謂之葯其
葉謂之葯麻與蘭同德俱生下濕故蘭芷之香為騷人
所諷諫

杜衡曰杜曰土鹵能香人衣體南人以亂細辛其葉似
馬蹄故亦名馬蹄香爾雅云杜土鹵

白薇曰白幕曰薇草曰春草曰骨美

蓂耳曰苓耳曰羊負來曰唱起草曰白胡荽江東曰常
蓂幽州曰爵耳爾雅卷耳苓耳舊說即蒼耳也其實似
鼠耳而有澁刺易黏人衣中原本無此草因羊自蜀來
其實帶毛而至故有羊負來之名然詩云采采卷耳以
其可茹也即今卷菜葉如連錢者是也若蒼耳但堪入
藥不可食

茅之根曰蘭根曰茹根曰地筋曰兼杜茅之類甚多惟
白茅擅名其苗初出地者曰茅鍼爾雅云荼委葉詩云

以葶茶蓼皆謂茅鍼也茅之花曰茅秀爾雅蓂莢荼是也茅之葉如管故亦名地管詩云白茅菅兮又云露彼菅茅

強瞿曰重邁曰中庭曰重箱曰摩羅曰中逢花即百合也俗呼強瞿根如葫蒜根美食花美觀舊云蚯蚓化成有二種白花者良其紅花者一名山丹一名連珠俗呼川強瞿莖上抽花葉間結子

酸漿曰寒漿曰醋漿江東曰苦葳俗謂之三葉酸漿沈括云即苦耽也其實如撮口袋中有珠子熟則紅關中謂之洛神珠亦曰王母珠亦曰皮弁草以其實又似弁也又有一種小者名苦蕒

牡蒙曰衆戎曰童腸曰馬行即紫參也唐明皇令方士姜撫採終南山之旱藕作湯餅賜大臣者即此草根也淫羊藿曰剛前曰黃連祖曰千兩金曰乾雞筋曰放杖草曰棄杖草關中曰三枝五葉草舊云西川北部有淫羊食此草一日百交今通謂之仙靈脾

羸蝨實曰荔實曰劇草曰三堅曰豕首曰馬薤即馬藟子也北人呼爲馬棟子江東呼爲旱蒲多植於階庭說文

云荔似蒲而小根可作刷月令云荔挺生

欵冬曰橐吾曰顛東曰虎須曰菟奚曰氏冬藥家用花

如批把舊云花冬月在冰下生緣此花傍莖近根生故在

冰下爾雅以顛東為顛凍注又以欵冬作欵凍

牡丹曰鹿韭曰鼠姑宿枝其花甚麗而種類亦多諸花

皆用其名惟牡丹獨言花故謂之花王文人為之作譜

記此不復區別然今人貴牡丹而賤芍藥獨不言牡丹

本無名依芍藥得名故其初曰木芍藥古亦無聞至唐

始著

澤蘭曰虎蘭曰龍橐曰虎蒲曰水香曰都梁香如蘭而

莖方葉不潤生於水中故曰水香荊州記都梁縣有山

山下有水清淺其中生蘭草因以為名

馬蘭生澤傍如澤蘭氣臭楚辭所喻惡草即此也

王孫曰黃孫曰黃昏曰海孫曰蔓延又楚曰王孫齊曰

長孫方家謂之牡蒙

百部曰婆婦草能去諸蟲可以殺蠅蠊其葉似薯蕷根

似天門冬故天門冬亦有百部之名一物足以相紊

王瓜曰上瓜曰擘姑曰鈞甌曰菲芴均房間曰老鴉瓜

又曰菟瓜其根可生食類瓜故得瓜名月令王瓜生即此也而鄭玄以爲獲藜誤矣爾雅言鈞曠姑郭云鈞甑一名玉瓜是矣又言菲芴又言黃兔瓜皆謂此也薺菀之根能亂人參而解藥毒以其與毒藥共處而毒皆自然歎

爾雅曰水臺菟葵曰天葵又曰葦菟葵雷公炮炙所用紫背天葵是矣葉如錢而厚嫩背微紫生於崖石凡丹石之類得此而後能神所以雷公一書汲汲於天葵恨世人不識之臣近得之於天台僧

鱧腸曰蓮子草曰旱蓮子曰金陵草生園圃葉似柳莖似馬齒莧其蓮翹亦曰旱蓮植於庭院其花可愛非鱧腸也

蒟醬曰浮留劉淵林蜀都賦注云蒟醬緣木而生其子如桑椹熟時正青以蜜藏而食之辛香生巴蜀嶺南司馬相如使蜀而求之也其狀似葦撥故有土葦撥之號今嶺南人但取其葉及藤合檳榔食之謂之蓼而不用其實

蘿摩曰花蘭曰苦丸幽州人曰雀瓢東人曰白環藤可

三百下
通志民生草木卷第一
九
作菜茹能補精益氣故諺云去家千里莫食蘿摩狗杞
剪草之根曰白藥

懷香即茴香

鬱金即薑黃周禮鬱人和鬱鬯注云煮鬱金以和鬯酒
又云鬱爲草若蘭今之鬱金作煇潘臭其若蘭之香乃
鬱金香生大秦國花如紅藍花四五月採之即香陳藏
器謂說文云鬱芳草也十葉爲貫捋以煮之用爲鬯爲
百草之英合而釀酒以降神也然大秦國去長安四萬
里至漢始通不應三代時得此草也或云鬱金與薑黃
自別亦芬馨恨未識耳

紅藍亦曰黃藍

華澄茄亦曰毗陵茄子

蓬莪茂似薑黃而不黃

廉薑似山薑而根大一名蔞

胡黃連似黃連而心黑一名割孤露澤

大黃曰黃良

常山曰互草

桔梗曰利如曰房圖曰白藥曰梗草曰薺老以其能亂

齊荒故亦有其名葉曰隱忍

甘遂曰甘藁曰陵藁曰陵澤曰重澤曰主田曰葶藶曰丁
藜曰藜蒿曰狗薺曰大室曰大適爾雅藜蒿亭歷

大戟曰卬鉅曰女木曰蕎曰髦爾雅髦顛棘其苗曰澤
漆曰漆莖

旋覆花曰金沸草曰戴椹曰盛椹曰盜庚爾雅獲盜庚
似菊俗呼金錢花

鉤吻曰除辛曰毒根折之青煙出者名固活即野葛也
藜蘆曰葱薺曰葱茨曰山葱曰葱葵曰豐蘆曰蕙葵

赭魁俗呼禹餘糧葉如薯蕷根如何首烏儉歲人採之
以療飢陳藏器謂禹會諸侯棄糧於地化爲此草

芟爾雅云葶草即烏頭也其類即別而說者紛紛初種
之母曰烏頭如芋魁是也其形似烏鳥之首故以爲名

兩岐如鳥開口者曰烏喙亦取其似也烏頭傍生者爲

附子附子傍生者爲側子烏頭不生附子者爲天雄極

長大故草經云長三寸以上也蜀人種之最忌生此草

經云春採爲烏頭冬採爲附子廣雅又云一歲爲側子

二歲爲烏喙三歲爲附子四歲爲烏頭五歲爲天雄今

皆不然但一歲下種而有此五物皆以冬至前布種至
八月採出於蜀中而綿州彰明縣猶多附子爲百藥之
長一名奚毒世以烏頭天雄附子爲三建者以此三物
舊皆出建平故也又宜都佷山者謂之西建殊佳錢塘
間者謂之東建不及故曰西冰猶勝東白烏頭曰奚毒
曰即子曰莨曰董曰千秋曰毒公曰果負曰耿子取其
汁日煎爲膏曰射罔射生者以傳矢慘毒
羊躑躅曰玉支
茵芋曰莞草曰卑真

射干曰烏扇曰烏蒲曰烏翼曰烏吹曰草薑曰鳳翼射
干亦作夜射干有三物佛書云射干貂獫乃是惡獸似青
黃狗食人荀子云西方有木名射干莖長四寸生於高
山之上而臨百仞之淵其花白莖長似射人執竿故阮
公詩云射干臨層城此則草類狀如鹿葱葉稍大邪張
作扇如翅狀故有烏扇烏翼鳳翼之名

貫衆曰貫節曰貫渠曰百頭曰虎卷曰扁苻曰伯萍曰
藥藻曰灤曰草鷓頭爾雅云灤貫衆
半夏曰守田曰地文曰水玉曰示姑

葭菕曰橫塘曰行塘其實作小嬰尾子謂之天仙子
常山曰互草

青箱曰草蒿曰萋蒿曰草藁花似後庭花實如葭菕子
俗呼牛尾蒿其主療與決明子同故亦有草決明之名
牙子曰狼牙曰狼子曰犬牙今皆謂之狼牙子以其根
之萌若獸牙也葉似蛇莓而大

白歛曰菟核曰白草曰白根曰崑崙藤生葉如小桑根
如雞卵

白及白甘根曰連及葉如初生檟欄根如菱米

蛇全曰蛇銜曰威蛇曰小龍牙

草蒿曰方漬曰散江東曰玃蒿即青蒿也爾雅云蒿葭

藿菌曰藿蘆生於蘆葦中云鶴矢所化故曰藿菌

連翹曰異翹曰蘭華曰折根曰軛曰三廉曰連若曰連

草爾雅云連異翹即旱蓮也葉似當歸華似菡萏

白頭翁曰野丈人曰胡王使者曰柰何草狀似白薇葉

生莖端上有白毛近根處有白茸正似垂白之翁

蘭茹曰屈摺曰離婁葉似大戟根如蘿菹黃白色初斷時

汁出凝黑如漆故云漆頭

羊桃詩曰葭楚爾雅曰鉞弋亦曰鬼桃曰羊腸曰御弋
葉花似桃子如棗枝劔南人名細子根

羊蹄曰東方宿曰連蟲陸曰牛薺曰菲詩曰言采其遂
爾雅曰菲蕙菜又曰藟牛薺今人呼為秃菜遂秃音訛
耳

鹿藿爾雅曰藟鹿藿其實菹田野呼為鹿豆

蓋草曰葭葦曰王葛曰鷓脚莎爾雅曰葭王葛又曰竹
篇蓄詩云綠竹猗猗即此是也今人謂之篇竹葉似竹
而細薄荆以染黃極鮮麗故草經云可染黃作

金色

夏枯草曰夕句曰乃東曰燕面

蚤休曰蚩休曰螫休曰重樓金線曰重臺曰草甘遂今
人謂之紫河車服食家所用而莖葉亦可愛多植庭院
間

虎杖曰枯杖曰苦杖曰大蟲杖曰酸杖曰班杖曰漆故

爾雅曰漆虎杖莖葉班赤似馬蓼而無毛

鼠尾草曰勤曰陵翹曰烏草曰水青可以染皂爾雅勤

鼠尾

芎野生者曰薜爾雅云薜山麻

菰曰蓬今人謂之麥爾雅曰齧彫蓬薦黍蓬彫蓬者米
麥也其米謂之彫胡可作飯故曰齧黍蓬者野麥也不
能結實惟堪薦藉故曰薦

葑菰根也亦名須故爾雅曰須葑菰又名菘焉

劉寄奴曰金寄奴即烏藤菜故江東人云烏藤菜劉寄
奴因宋武帝而得名帝微時伐荻薪洲遇大蛇射之明
日往見群兒擣藥問之乃曰我王爲劉寄奴所射今擣
此藥傳之帝呵之群兒忽不見遂收其藥還以傳令

無不愈者帝姓劉小名寄奴江南人姓劉者或呼爲
是以又有金寄奴之名

牽牛子曰草金鈴曰盆甌草陶弘景云以療水腫有功
田野人牽牛以易之故得名

猪膏莩曰虎膏曰狗膏亦曰豨莶能亂天名精

葎曰來苒草曰葛葎蔓葎似草麻子似大麻

獨行根曰雲南根曰兜零根山南人謂之士青木香其
實曰馬兜零

狼毒曰續毒藥家以此與麻黃橘皮吳茱萸半夏枳實

爲六陳

鬼曰曰雀犀曰馬曰毒公曰九曰曰天曰曰解毒葉如荷葉形似鳥掌年長一莖莖枯則根爲一曰服食家用之以九曰相連者爲佳亦名八角盤以其葉然也

蘆爾雅曰葭蘆又曰蒹葭又曰蒹葭蘆之大者曰葭小者曰蒹蒹即荻也可爲簾箔故曰蒹其小而實者曰葦蒹即葦也其萌曰蘗蘗蘆筍也其榮曰芳芳蘆花也故曰葦醜芳亦謂之葭故曰葭華

篇蓄即篇竹也衛風云綠竹猗猗綠蓋草竹篇蓄

酢漿草曰醋母草曰鳩酸草曰小酸茅南人曰孫施去銅鑰垢

商陸曰遠蕩曰荔根曰夜呼曰馬尾曰莧陸曰章陸曰章柳根曰當曰菑詩云言采其菑爾雅云當當又云遠蕩馬尾皆此也或言爾雅拜蒟藿亦爲此耳根如人形者有神道家以爲脯謂之鹿脯有赤白二種白者服食所須赤者爾雅謂之藟茅

灰藿曰金瑣天葉心有粉如鹽而不鹹灰藿與藜亦是同類但藜大可爲杖也

尾松曰昨葉何草

骨碎補曰石菴蘭曰骨碎布曰石毛薑江南曰胡孫薑
根著木石上有毛葉如菴蘭俗呼猴薑唐明皇以其主
折傷補骨碎有奇功故賜名

雀麥曰齋曰燕麥曰牡姓草似麥而小故得其名

天南星曰鬼蒟蒻而有毒

蒟蒻其實曰蒟蒻生於葉下與天南星班杖相似其根生
時可爲糊黏熟之可食

續隨子曰拒冬曰千金子曰聯步曰千兩金曰菩薩豆

人家多種於園亭其花似太戟秋種冬長春秀夏實

穀精草生於穀田中亦曰戴星草欲人早耕也

列當曰粟當曰草蓂蓉生巖石上根如藕能亂蓂蓉

威靈仙曰能消惡聞水聲能治痿弱唐貞元中周君巢
爲之作傳

何首烏曰野苗曰交藤曰夜合曰地精曰陳知白曰桃

柳藤有赤白二種赤者雄白者雌雌雄異本而能相交

何首烏者順州南河人初名田兒生而閹弱年五十八

無妻子卧田野中見田中之藤兩本異生而能相交久

乃解解而復合如此數四田兒異之斲根而服七日而
思人道十年而生數男頭白變黑遂以名此草其人年
百三十子庭服之年百六十唐元和間事也

預知子曰仙沼子曰聖知子曰聖先子曰盍合子實如
皂莢子傳云取二枚綴衣領上遇蟲毒初則聞其有聲
故有預知之名蜀人貴重之

仙茅曰獨茅根曰茅瓜子曰婆羅門參傳云十斤石到
不及一斤仙茅

萱草曰合歡草曰無憂草言能令人樂而忘憂花曰
男婦人喜佩之風土記云孕婦佩其花則生男

金星草生於陰崖或瓦木上葉背有金星相對燼火家
所用也

薇生水傍葉如萍爾雅云薇垂水三秦記夷齊食之三
年顏色不變武王戒之乃食而死然詩云采薇者金櫻
芽也

無風獨搖草頭如彈子尾若鳥尾兩片開合見人自動
石藥生太山石上如花藥王隱晉書云庾袞入林慮山
餌石藥得長年

孝文非人多食之能行後魏孝文帝好食此故得名
陳家白曰吉利菜葉如錢根如防已又有婆羅門白甘
家白三白相似

孟娘菜曰孟母菜曰厄菜葉似什麻方莖

越王餘筭生南海水中如竹筭子長赤許異苑云越王
行海作壽有餘棄於水中而生

風延母細葉蔓生纓繞草木南都賦云風衍蔓延於衡
臯是也

律菜字林云味辛南人食之去冷氣

優殿南方草木狀曰合浦人種之用醬汁而食芳香

宜男草廣州記云小男女佩之臂上辟惡止驚生廣南
朝至暮落花生糞穢處頭如筆紫色朝生暮謝小兒呼
爲狗溺臺又名鬼筆菌類也非槿

蕒草曰軒于爾雅云蕒蔓于臭草也生水中江東人呼
爲茵證俗云蕒水草也

蘆蒿先於百草而生爾雅云莪蘿注云蘆蒿也小雅云
菁菁者莪陸璣云莪蒿也一名蘿蒿

麗春草河南曰龍茅草河北曰葭蘭艾生上黨者曰定

參草亦曰仙女蒿此草主黃疸之疾唐天寶中始有聞焉

蔬類

白瓜曰水芝曰地芝即白冬瓜也

葵之類多爾雅曰有戎葵即蜀葵一名苒又曰苳蚘蚘注云荆葵也一名苳一名蚘蚘又曰苳葵繫露注云落葵也一名承露一名藤葵一名胡胭脂蔓生繞籬落葉圓而厚子如豆生青熟黑按之則色紫女又以漬粉傅顏為假色又有龍葵一名苦葵葉圓似排風而無毛

羅勒俗呼西王母菜北人呼為蘭香為石勒諱也

胡荽曰胡荽并州人呼為香荽亦為石勒諱也

苦菜曰荼曰選曰游冬爾雅云荼苦菜詩谷風云誰謂荼苦其甘如薺月令云苦菜秀

萊服一名電葵一名溫菘一名紫花菘吳名楚菘嶺南名秦菘河朔名蘆菘爾雅曰葵蘆菘俗呼蘿蔔鎮州者一根可重十六斤

薤與韭同類雖辛而不葷五藏所以學道之人服之有赤白二種白者補而美赤者主金創不結子一名鴻薤

爾雅云齷鴻薈

韭之性溫故謂之草鍾乳易稽覽圖云政道得則陰物變為陽鄭玄注謂若葱變為韭是也可知葱冷而韭溫然葷臭非養性所宜多食亦昏神

蘇爾雅曰蘇桂荏此紫蘇也葉實俱良

水蘇曰雞蘇曰勞祖曰芥菹曰芥苴曰臭蘇曰青白蘇今人皆呼雞蘇亦呼水蘇不可食

荏曰蕪似蘇而高大葉不可食惟子可壓油及雜米作蘖甚肥美

蕨一名驚莽牙也四皓食之而壽夷齊食之而夭搜神記曰郗鑿鎮丹徒二月出獵有甲士折一枝食之覺心中淡淡成病後吐一小蛇垂之屋前漸乾成蕨明此物不可生食爾雅云蕨驚又有一種大蕨亦可食謂之藜蕨爾雅云藜月爾

芸臺亦作雲臺爾雅云臺夫須

藜藿曰藜爾雅云藜藿藜生於園圃蔓細弱田野人食之可作牙藥

雞腸似藜而小不辛本草以合於藜藿共條故蘇恭誤

謂即繁萋也

董曰齧曰苦董爾雅云齧苦董今人亦謂之董菜野出
味雖苦而甘黃花者殺入唐武后真諸食中以毒賀蘭
氏暴死者蓋此種也

藪曰職爾雅云職黃蔕葉似蒟醬蔓生田野陰濕處關
中曰蒟菜以其生可爲蒟也

馬藍田野人以為菜茹爾雅云蒧馬藍

苦苣野生者曰褊苣人家常食者曰白苣

薺之菜甚小自生園圃其實曰差爾雅云差薺實詩云

其甘如薺謂此菜之美也或以薺爲薺芘

芹亦作蘄爾雅曰芹楚葵詩曰言采其芹一名水英一
名楚葵

馬芹爾雅曰莛牛蘄俗謂胡芹其根葉不可食惟子香
美可調飲食所謂野人快炙背而美芹子是也

莪莪蒿也一名蘿故又謂之蘿蒿爾雅云莪蘿詩云菁
菁者莪本草謂蘆蒿

苻曰接余爾雅云苻接余其葉苻詩云參差苻菜今謂
之水苻蔓鋪水上故杜詩水苻牽風翠帶長

蕪菁亦作蔓菁塞北名九英此菜多生邊塞一名須一名菴蕪一名葑菹見爾雅春食苗夏食心秋食莖冬食根菜之最益人者惟此爾多種可以備飢歲昔諸葛孔明所止輒令兵士種蔓菁云取其才出甲可生啖一也葉舒可煮食二也久居則隨以滋長三也棄不令惜四也回則易尋而採之五也冬有根可斲而食六也比諸蔬屬其利博乎今三蜀江陵人猶呼此為諸葛菜大槩似菘而有頭南人取而種之初年相類至二三年則變為菘矣惟河朔最多詩谷風云采葑采菲此即葑也

蓼有三種按陶弘景云一種紫蓼一種青蓼一種香蓼其葉有圓有尖以圓者為勝入藥用蓼實有一種馬蓼亦可入藥其最大者謂之葑草亦謂之龍葑爾雅云紅龍古其大者歸

藜荷有白赤二種陶弘景云今人赤者為藜荷白者為覆藜食用赤者藥用白者其性好陰在木下者尤美故潘岳閑居賦云藜荷依陰時藿向陽也搜神記云蔣士先得疾下血言中蠱家人蜜以藜荷置其席下忽大笑曰蠱我者張小也乃收小故以此為治蠱之最周禮庶

氏掌除蠱毒以嘉草攻之宗懔謂嘉草即此也
萼滑而美所以張翰思萼羹而歸也二月至八月採者
名絲萼味甘而體軟霜降以後名瑰萼味苦而體澁
葫大蒜也蒜小蒜也小蒜一名亂子
馬齒莧一名馬莧可煮丹砂結汞又名五行草以其葉
青梗赤花黃根白子黑也其葉間有水銀可燒取
雍菜主解野葛毒南人先食雍菜後食野葛自然無苦
又取汁滴野葛苗當時菸死張司空云魏武帝噉野葛
至一赤應是先食此也

菠薐菜本出頰陵國張騫帶來語訛為菠

菱首菱草之首有一種可食一名菱白一名菰首一名
須爾雅云須葑菰

稻粱類

稷苗穗似蘆而米可食為五穀之長五穀不可徧祭故
祀其長以配社今人謂之稌關西謂之糜冀州謂之緊
粱梁也爾雅云以粱為稷誤也

胡麻曰巨勝曰狗虱曰方莖曰鴻臚曰方金曰藤苡其
葉曰青蘘今之油麻也亦曰脂麻本出大宛張騫傳來

故名胡麻沈活靈苑方中論之矣今鑿家認黃麻子作胡
麻用其子極苦能殺人毒鼠此豈可服食哉陶弘景云八
穀之中惟此為良而純黑者名巨勝是為大勝此斷穀長
生充飢之藥故云胡麻好種無人種正是歸時君不歸
麻子者大麻子也脂麻為胡麻此為漢麻脂麻為細麻
此為大麻亦謂之臬然有牝牡其牡者生花曰麻臬亦
曰麻勃吐出苴苴然蘇恭謂爾雅云臬實以麻臬即
麻子不知爾雅之誤

梁之類多爾雅芑白苗白梁也又曰釁赤苗赤梁也又

有青梁有黃梁汜勝之書云梁是秫粟今俗謂之梁古
祭祀所用梁盛是也可作飡食及釀酒亦如糯米或云
梁亦有粳者其謂藥米亦曰黃子

黍本草丹黍爾雅云秬黍秬一稔二米秬是黑黍之有
二米者黍之糯者謂之秬一名黃糯

童梁曰狼曰守田曰皇爾雅云狼童梁又曰皇守田今
人謂之鬼稻一穗未有數粒易落在田中明年復生故
有守田之名亦能亂稼

稻有粳糯二種古人謂糯為稻五穀之類皆有粳糯粟

之糯曰梁曰粢黍之糯曰秫曰粳爾雅云衆秫是也類
師古刊謬正俗曰本草所謂糯米者今之糯米也又說
文云沛國謂稻爲糯

彫胡菰蔣米也爾雅云齧彫蓬

鬯子粟曰象穀曰米囊曰御米

豆之類多爾雅云藺鹿藿其實菹今之鹿豆也苗似豌豆
蔓生亦可爲菜根黃而香本草大豆之藿謂之黃卷
亦謂之卷藿小豆之花謂之腐婢

昆蟲草木略第一

通志七十五

